

**Akilerartarnermut aammalu inuussutissarsiornermut malittarisassat atuuttut misissuiffiqineqassasut, ilanngullugit B-skat pillugu malittarisassat kiisalu allaffissornikkut piumasaqaatit allat, siunertaralugu inuussutissarsiornermut ineriartortitsinerimut suliffissanik pilersitsinermullu Kalaallit Nunaanni pisariaqanngitsunik killilersuinerit aporfissallu suussusersineqarlutik atorunnaarsinneqarnissaat Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Lars Poulsen, Siumut)

### **Akissuteqaat**

(Nunanut allanut, Inuussutissarsiornermut, Aatsitassanullu Naalakkersuisoq)

### **Siullermeerineq**

Inatsisartunut ilaasortap Lars Poulsenip, Siumut, siunnersuuteqarneranut Naalakkersuisut sinnerlugit qutsavigaara.

Inuussutissarsiutinik ineriartortitsinissamut, suliffissanillu pilersitsinissamut pisariaqanngitsunik killilersuinerit, aporfissallu atorunnaarsinneqartariaqarnerinut Naalakkersuisut aallaavittut isumaqataapput, soorluttaa maani nunami suliffeqarfimmik ingerlatsineq aamma pisariinnerullunilu imminut akilersinnaassasoq.

Demokraatit, IA, Siumut aamma Atassut kingullermik Naalakkersuisooqatigiinnissamik isumaqatigiissutaanni inuussutissarsiornermut akilerartarnermik aaqqissuusseqqinnerup aallartinneqarnera, namminersortunik siuariartortitsineq, ineriartortitsinerlu aamma tunualiaqutaavoq.

Ilaatigut suliffeqarfiit mikisut, akunnattumillu angissusillit, aallarnisaanerit kiisalu malittarisassanik aamma inatsimmik pisariillisaanikkut, aaqqissuusseqqinnermik suliaqarneq suliffeqarfimmik ingerlatsinissamik pisariinnerulersitsillunilu pilerinarnerulersitsissaaq.

Namminersorluni inuussutissarsiuteqarnermi aningaasaliinissap, tunisassiornerullu annertusinissaa imminut akilersinnaanerunissaa kiisalu inuussutissarsiorfinni sulisut ikinnerulernerinut taartaasinnaasutut, suliffeqarfiillu avammut nioqquteqartartut siuarsarnissaannut teknologiumut, automatiserinngimullu aningaasaliinissap ilalerneqarnissaa siunertaavoq.

Taassuma saniatigut akilerartarnermi malittarisassat naleqqutinngitsut, Kalaallit Nunaanni aningaasaliinernut akornutaasinnaasut suliap ersarissassavai. Akileraarutit B-t, akileraarutinullu atatillugu allaffissornikkut piumasaqaatit allat pillugit eqqarsaatit aalajangiiffigisassatut siunnersuummi ersarissarneqartut, inuussutissarsiornermut

akileraartarnermik aaqqissuusseqqinnerup nangillugu suliarinerani ilaatinneqarsinnaakutsoorput. Inuussutissarsiorfinnit peqataatitaqarluni misissuinermit tunuliaqutaasut pilersinneqareerput, suliarlu aallartinneqareerluni.

Inuussutissarsiornermut akileraartarnermik aaqqissuusseqqinneq, Attassiinnarnissamut Ineriartortitsinissamullu pilersaarut 2-mut atatillugu isigineqassaaq, tassani namminersortunik siuariartortitsinikkut kiisalu sulinerup annertusineqarneratigut, inuiaqatigiinnilu pitsuunerup annikillisinneqarneratigut inuussutissarsiornerup aaqqissugaanera assigiinngissitaartoq inuussutissarsiutit pillugit politikiummat, pingaarnertullu anguniagaalluni. Pisortat inuussutissarsiutit imarisaannut sinaakkutinik pilersitsinatik, inuussutissarsiortunut sinaakkutinik pilersitsinissaat tassunga aallaaviuvoq.

Taassuma saniatigut ingerlatseqatigiiffinnut, naatsorsuutitut, kukkunersuisarnermullu suliaaqqarfiup tiguineqarnissaa pillugu suliaq aallartinneqareerpoq, sulinermilu tassani inuussutissarsiutit pillugit inatsisip misissornissaanut, taamaalillunilu iluarsisassatut pisariaqarsinnaasut ersarissarnissaanut periarfissaassalluni.

Ajornartorsiutit siunnersuuteqartup misissoqqissaagassatut siunnersuutigisai arlaqartut massakkut aaqqissuusseqqinnermik suliaqarnermi sammineqareermata, aalajangiiffisassatut siunnersuummut tulliuttumi allannguutissatut siunnersuut inassutigineqarpoq:

**”Naalakkersuisut inuussutissarsiornermut akileraartarnermik aaqqissuusseqqinnermik, inuussutissarsiutinullu tunngatillugu suliniutini atasuni nangillugu suliaqarnermini Kalaallit Nunaanni inuussutissarsiutinik ineriartortitsinissamut, suliffissanillu pilersitsinissamut pisariaqanngitsunik killilersuinerit, aporfissallu atorunnaarsinneqarnissaat sulissutigissagaat pillugu, Inatsisartut aalajangiiffisassaattut siunnersuut.”**

Taamatut oqaaseqarlunga immikkoortup Inatsisartunit oqaluuserineqarnissaanut ingerlateqqippara.